

UNIVERZITET U SARAJEVU  
FILOZOFSKI FAKULTET

PRAVILNIK  
CENTRA ZA NAUČNOSTRAŽIVAČKI RAD  
I STRUČNE AKTIVNOSTI  
(CENTAR NIRSA)

Sarajevo, maj 2018. godine

## **PRAVILNIK**

### **CENTRA ZA NAUČNOISTRAŽIVAČKI RAD I STRUČNE AKTIVNOSTI FILOZOFSKOG FAKULTETA UNIVERZITETA U SARAJEVU**

#### **SADRŽAJ:**

#### **I. OPŠTE ODREDBE**

#### **II. ORGANIZACIJA**

#### **III. VODITELJ CENTRA**

#### **IV. NAUČNI SAVJET CENTRA**

#### **V. STRUČNI SARADNIK**

#### **VI. DOKUMENTACIJA**

1. Pohranjivanje i čuvanje dokumentacije

2. Potpisivanje i ovjeravanje dokumentacije

#### **VII. SREDSTVA ZA RAD**

#### **VIII. FINANSIRANJE RADA**

#### **IX. NAUČNA ZVANJA**

#### **X. PROJEKTI**

1. Klasifikacija projekata

2. Potpisivanje i ovjeravanje dokumentacije

3. Obrada prijave i dokumentacije projekata

#### **XI. POSLOVNA TAJNA**

#### **XII. OPŠTI AKTI**

#### **XIII. PRELAZNE I ZAVRŠNE ODREDBE**

Na osnovu člana 32. Zakona o visokom obrazovanju („Službene novine Kantona Sarajevo” broj: 33/17.), Zakona o naučno-istraživačkoj djelatnosti Kantona Sarajevo („Službene novine Kantona Sarajevo” br. 26/16.), člana 87. do 94. Pravila Filozofskog fakulteta u Sarajevu (Prečišćeni tekst) broj: 01-02/178-1 od 27. 9. 2004. godine, Pravilnika o radu Filozofskog fakulteta Univerziteta u Sarajevu, i člana 7. i 8. Pravilnika o organizaciji Fakulteta i sistematizaciji sa opisom poslova radnika Fakulteta, Vijeće Fakulteta na 2. redovnoj sjednici održanoj 12. 6. 2018. godine, *donijelo je*

## **PRAVILNIK**

### **CENTRA ZA NAUČNOISTRAŽIVAČKI RAD I STRUČNE AKTIVNOSTI FILOZOFSKOG FAKULTETA U SARAJEVU**

#### **I. OPĆE ODREDBE**

##### **Član 1.**

Centar za naučnoistraživački rad i stručne aktivnosti (u nastavku: Centar NIRSA) je organizacijska jedinica Filozofskog fakulteta Univerziteta u Sarajevu.

##### **Član 2.**

Filozofski fakultet u Sarajevu putem Centra NIRSA ostvaruje svoju ulogu u naučnom, istraživačkom i stručnom radu uz redovne nastavne aktivnosti koje ovaj rad omogućava i daje im vrijednost u ukupnom procesu obrazovanja svih aktera.

Filozofski fakultet u Sarajevu putem Centra NIRSA ostvaruje aktivnu ulogu u razvijanju naučnog pristupa u dizajniranju nacionalnih programa na polju humanističkih i društvenih nauka, uključivanjem u internacionalne i transnacionalne programe, uključivanjem u evropske i svjetske tokove naučne misli, istraživanja i ekspertnih znanja društva zasnovanog na znanju.

##### **Član 3.**

Centar NIRSA djeluje pod nazivom Filozofski fakultet Univerziteta u Sarajevu, Centar za naučnoistraživački rad i stručne aktivnosti.

Skraćeni naziv: Filozofski fakultet Univerziteta u Sarajevu, Centar NIRSA

Sjedište: Franje Račkog 1, Sarajevo

Naziv na engleskom jeziku: Faculty of Philosophy University of Sarajevo, Centre for Scientific Research and Professional Activities

Skraćeni naziv na engleskom jeziku: Faculty of Philosophy University of Sarajevo,  
NIRSA CENTRE

#### **Član 4.**

Na dokumente Centra NIRSA stavljaju se štambilj i pečat Filozofskog fakulteta Univerziteta u Sarajevu čiji su oblik, veličina i sadržaj u skladu sa Odlukom Upravnog odbora Fakulteta u skladu sa Pravilima Filozofskog fakulteta Univerziteta u Sarajevu.

Centar NIRSA u korespondenciji koristi logo i memorandum Filozofskog fakulteta u Sarajevu sa naznakom Centra za naučnoistraživački rad i stručne aktivnosti.

#### **Član 5.**

Dokumenta koja se upućuju iz Centra NIRSA, potpisuje voditelj Centra ili zamjenik voditelja Centra i prodekan za naučnoistraživački rad i međunarodnu akademsku saradnju i izdavaštvo, odnosno dekan Fakulteta.

#### **Član 6.**

Centar NIRSA u elektronskim medijima ima svoju veb stranicu zakupljenu na ekonomski prihvatljivom hostingu.

Centar NIRSA na svojoj internetnoj stranici koristi naziv Filozofski fakultet u Sarajevu, Centar za naučnoistraživački rad i stručne aktivnosti (Centar NIRSA) i logo Filozofskog fakulteta Univerziteta u Sarajevu.

Centar NIRSA dizajnira cjelokupnu stranicu sa elementima koji motiviraju pozitivan odnos prema naučnom, istraživačkom i stručnom radu korisnika stranice i pretraživača.

#### **Član 7.**

Centar NIRSA ne nastupa samostalno u pravnom i finansijskom prometu, nego u sastavu Filozofskog fakulteta Univerziteta u Sarajevu.

Sva sredstva iz sponzorskih ugovora, donacija i usluga koje ostvaruju organizacijske jedinice u sklopu Centra NIRSA vode se preko računa Filozofskog fakulteta Univerziteta u Sarajevu.

Sredstva dobivena iz naučnih i istraživačkih projekata, sredstva dobivena iz sponzorskih ugovora i donacija, i sredstva dobivena iz komercijalnih usluga putem edukacijskih centara, raspoređuju se prema aktima Filozofskog fakulteta Univerziteta u Sarajevu, te drugim aktima koji uređuju navedenu materiju i Zakonom.

## **Član 8.**

U skladu sa Pravilima Filozofskog fakulteta Univerziteta u Sarajevu (prečišćeni tekst), te registrovanom djelatnosti Fakulteta, određuje se i djelatnost Centra NIRSA i to: naučnoistraživački rad iz *filozofskih, socioloških, historijskih, historije umjetnosti, arheoloških, pedagoških, psiholoških, filoloških, lingvističkih*, iz oblasti *primijenjene lingvistike, metodike nastave, književnohistorijskih i bibliotečkih nauka, socijalne pedagogije, antropologije i etnologije*, te i djelatnosti: stručnog obrazovanja i usavršavanja, nostrifikacija diploma, provjera znanja iz maternjeg (bosanskog, hrvatskog i srpskog) i stranih jezika, dopunski ispiti, prevodilački rad, lektorisanje, pedagoško i permanentno obrazovanje, izdavačka i druga djelatnost, konsultantske i ekspertne usluge, te nastavnonaučni i stručni poslovi u skladu sa Zakonom.

## **Član 9.**

Filozofski fakultet Univerziteta u Sarajevu putem Centra NIRSA obavlja temeljna i aplikativna istraživanja, te vodi računa o razvoju i djelovanju Filozofskog fakulteta i njegovih matičnih katedri i odsjeka u okviru razvojno-istraživačkih programa Bosne i Hercegovine.

Filozofski fakultet Univerziteta u Sarajevu uključuje se putem Centra NIRSA u međunarodnu naučnu saradnju u svijetu sa naučnoistraživačkim Institucijama i organizacijama koje imaju srodne programe i djelatnosti.

## **Član 10.**

Za ukupni rad Centra NIRSA odgovoran je dekan Filozofskog fakulteta Univerziteta u Sarajevu.

Za organizaciju aktivnosti i izvršavanje neposrednih radnih zadataka u Centru NIRSA, za povezivanje istraživača i stvaranje istraživačkih timova u realizaciji obrade i postupka prijavljivanja projekata odgovoran je voditelj Centra NIRSA.

## **II. ORGANIZACIJA**

### **Član 11.**

Centar NIRSA je organiziran tako da u realizaciji naučnog, istraživačkog i stručnog rada kroz nacionalne projekte, međunarodne projekte, projekte lokalnih zajednica i druge projekte može postići najveći uspjeh timova ili istraživačkih skupina koje djeluju na polju humanističkih nauka ili društvenih nauka ili interdisciplinarno.

### **Član 12.**

Za obavljanje djelatnosti iz člana 11 ovog pravilnika u Centru NIRSA formiraju se naučnoistraživački instituti i naučni, stručni i edukacijski centri.

Informatičku i stručnu podršku radu Centra daju uposlenici Sekretarijata i Biblioteke Fakulteta, a isto se ogleda u obavljanju bibliotečkoinformatičkih poslova, informatičke komunikacije, administrativnostručnih poslova i izdavačkih poslova.

U skladu sa Zakonom o naučno-istraživačkoj djelatnosti i Zakonom o visokom obrazovanju Kantona Sarajevo na Fakultetu se organiziraju instituti, naučni, stručni i edukacijski centri kao posebne organizacione jedinice sa ciljem unapređenja nastavnog, istraživačkog i naučnog rada u okviru djelatnosti Fakulteta u oblastima za koje je matičan.

U skladu sa potrebama nastavnog, istraživačkog i naučnog procesa na Fakultetu instituti, naučni, stručni i edukacijski centri mogu povezivati određene oblasti ili podoblasti, koje obuhvataju više katedri, odsjeka, centara, disciplina ili oblasti istog ili sličnog studijskog, akademskog ili naučno-istraživačkog usmjerenja. U određenim slučajevima mogu se povezati i različita studijska, akademska ili naučno-istraživačka usmjerenja na principima interdisciplinarnosti, multidisciplinarnosti, ili transdisciplinarnosti pojedinih studija.

Centar za naučnoistraživački rad i stručne aktivnosti (Centar NIRSA) čine slijedeće organizacione jedinice:

1. Institut za teorijska, analitička i primijenjena istraživanja u društvenim i humanističkim disciplinama,
2. Institut za arheologiju,
3. Institut za književnost i kulturološke studije,
4. Centar za jezik,
5. Centar za psihološka istraživanja, edukaciju i savjetovanje,
6. Centar za permanentno usavršavanje i cjeloživotno učenje;
7. Znanstveno-istraživački inkubator (ZINK),
8. Centar za historijska istraživanja.

U sastavu Centra za naučnoistraživački rad i stručne aktivnosti (NIRSE) predviđena je izdavačka djelatnost elektronskih i printanih monografija, godišnjaka i naučnih časopisa sa redakcijom za svaku od izdavačkih djelatnosti koju zajednički imenuje voditelj Centra NIRSA i dekan Fakulteta.

### **Član 13.**

Dekan Fakulteta postavlja voditelje instituta, naučnih, stručnih i edukacijskih centara.

### **III. VODITELJ CENTRA**

#### **Član 14.**

Voditelj Centra NIRSA organizira rad u Centru, koordinira aktivnosti unutar Centra, predstavlja Centar NIRSA i odgovara za izvršavanje poslova uposlenika u Centru, poslova na obradi projektne dokumentacije i informiranja istraživača.

Voditelj Centra NIRSA je uposlenik Filozofskog fakulteta Univerziteta u Sarajevu u zvanju redovnog ili vanrednog profesora koji ima iskustva u naučnom i istraživačkom radu u nacionalnim i internacionalnim programima.

Voditelja Centra NIRSA bira Vijeće Filozofskog fakulteta Univerziteta u Sarajevu na prijedlog dekana fakulteta.

#### **Član 15.**

Za neposredni rad Centra NIRSA, voditelj Centra NIRSA odgovara dekanu Filozofskog fakulteta, odnosno prodekanu za naučnoistraživački rad i međunarodnu akademsku saradnju i izdavaštvo.

#### **Član 16.**

Za voditelja Centra NIRSA može biti imenovan uposlenik Filozofskog fakulteta Univerziteta u Sarajevu koji ispunjava sljedeće uvjete:

- ima izbor u zvanju redovnog ili vanrednog profesora,
- ima sposobnost za organiziranje i vođenje istraživačkog rada,
- koji je sudjelovao u nacionalnim i internacionalnim istraživačkim programima,
- čiji su radovi interdisciplinarnog karaktera,
- koji posjeduje druge kvalitete potrebne za timski rad,
- koji ispunjava i druge uvjete Zakona o naučnoistraživačkom radu.

#### **Član 17.**

Voditelj Centra NIRSA:

- organizira, vodi i usklađuje naučno-istraživački, obrazovni i stručni rad te poslovanje Centra NIRSA,
- u skladu sa svojim ovlaštenjima brine za zakonitost rada u Centru NIRSA,
- predlaže temeljne razvojne i poslovne politike Centra,
- predlaže ustanovljavanje ili ukidanje organizacijskih jedinica u Centru NIRSA,
- predlaže godišnji i četverogodišnji izvještaj o izvođenju programa naučnom savjetu Centra NIRSA,
- saziva i vodi sjednice Naučnog savjeta Centra NIRSA,
- jednom godišnje izvještava o radu Naučni savjet Centra NIRSA i dekana Filozofskog fakulteta Univerziteta u Sarajevu,

- predlaže imenovanje voditelja organizacijskih jedinica Centra NIRSA i članove radnih grupa za pojedinačna područja, te komisije i druga radna tijela Centra,
- odgovoran je za praćenje, utvrđivanje i osiguranje kvaliteta rada Centra NIRSA, naučnoistraživačkog i stručnog rada, kao i za godišnju evaluaciju toga rada,
- vrši i druge poslove u skladu sa Zakonom o naučnoistraživačkoj djelatnosti, Statutom Univerziteta i Pravilima Filozofskog fakulteta Univerziteta u Sarajevu.

#### **Član 18.**

Voditelj Centra NIRSA je predsjednik Naučnog savjeta Centra NIRSA.

#### **Član 19.**

Voditelj Centra NIRSA ima pravo da sudjeluje u projektima kao voditelj projekta ili kao istraživač na projektu.

#### **Član 20.**

### **VODITELJI INSTITUTA/LABORATORIJA/STRUČNIH CENTARA**

(1) Voditelj instituta/laboratorije/centra obavlja poslove iz nadležnosti instituta/laboratorije/centra:

- izrađuje plan i program rada instituta/centra/laboratorije;
- organizira rad instituta/centra/laboratorije;
- predlaže saradnju i surađuje sa drugim institutima/centrima/ laboratorijima u cilju obavljanja poslova iz nadležnosti;
- predlaže objavljivanje radova članova instituta/centra/ laboratorije;
- vodi brigu o finansijskim, materijalnim i drugim pitanjima vezanim za rad instituta/centra/laboratorije;
- obavlja i druge poslove u skladu sa Zakonom, Statutom Univerziteta, Pravilima Fakulteta i Pravilnikom o radu Centra NIRSA.

(2) Za svoj rad voditelj instituta/centra/laboratorija odgovoran je voditelju Centra za naučnoistraživački rad i stručne aktivnosti, prodekanima Fakulteta i Vijeću Fakulteta.

*Uvjeti za izbor:* akademsko osoblje iz reda redovnih, vanrednih profesora i docenata.]



#### **IV. NAUČNI SAVJET CENTRA**

##### **Član 21.**

Naučni savjet je najviši naučni i stručni organ Centra NIRSA.

##### **Član 22.**

Naučni savjet Centra NIRSA čini voditelj Naučnog centra, voditelji svih organizacionih dijelova i članovi svih redakcija, dekan i prodekani Fakulteta.

Voditelj Centra NIRSA je po funkciji član Naučnog savjeta i njegov je predsjednik.

Naučni savjet ima zamjenika predsjednika kojeg na prijedlog voditelja Centra NIRSA biraju njegovi članovi.

Sjednicama Naučnog savjeta prisustvuje sekretar Fakulteta, bez prava odlučivanja.

##### **Član 23.**

U Naučnom savjetu mora biti osigurana zastupljenost svih nastavno-naučnih odsjeka i katedri, instituta, naučnih, stručnih i edukacijskih centara, koje su u navedenoj djelatnosti Filozofskog fakulteta Univerziteta u Sarajevu.

##### **Član 24.**

Članove naučnog savjeta Centra NIRSA bira Vijeće Filozofskog fakulteta Univerziteta u Sarajevu.

Vijeće Fakulteta utvrdit će svojom odlukom ekvivalent zvanja i akademskih titula stečenih u skladu sa Zakonom o visokom obrazovanju, sa zvanjima koja se stiču prema Zakonu o naučnoistraživačkom radu.

##### **Član 25.**

Naučni savjet Centra NIRSA, kao naučni i stručni organ, razmatra i odlučuje o pitanjima s područja naučnog i stručnog rada Centra NIRSA, svojim radom daje podršku naučno-istraživačkom i stručnom radu voditelja Centra NIRSA, brine za programska usmjerenja djelatnosti kojima se bavi Centar NIRSA, obliku stručnih ciljeva, razmatra i predlaže istraživački program i druge programske ciljeve s područja humanističkih i društvenih znanosti.

##### **Član 26.**

Nadležnosti Naučnog savjeta:

- prati Zakon o naučnoistraživačkom radu i Zakon o visokom obrazovanju i stara se o njegovoj primjeni,
- oblikuje stručne prijedloge za pripremanje istraživačkih programa Filozofskog fakulteta Univerziteta u Sarajevu,
- oblikuje stručne prijedloge za studijske programe na području istraživanja kojima se bavi,
- daje mišljenje i poticaj u pitanjima organizacije i uvjeta za razvoj djelatnosti,
- donosi godišnji program rada i izvještaj o radu Centra NIRSA,
- utvrđuje prijedlog godišnjeg finansijskog plana i programa rada,
- utvrđuje prijedlog izvještaja o radu i programa rada Centra,
- na zahtjev dekana i Vijeća Filozofskog fakulteta daje prijedloge, mišljenja i ocjene o svim stručnim pitanjima naučnog, istraživačkog i stručnog rada na području humanističkih i društvenih nauka,
- predlaže i daje mišljenje o nabavi važnih dijelova istraživačke opreme u Centru NIRSA,
- predlaže imenovanje predstavnika Filozofskog fakulteta u tijela naučnih i stručnih organizacija i organa izvan Filozofskog fakulteta Univerziteta u Sarajevu,
- radi druge naučne i stručne poslove za koje ga ovlasti Vijeće Filozofskog fakulteta na prijedlog dekana Filozofskog fakulteta.

#### **Član 27.**

Rad sjednica Naučnog savjeta utvrdit će se Poslovníkom o radu.

#### **Član 28.**

Naučni savjet Centra NIRSA donosi odluke većinom glasova članova Naučnog savjeta.

#### **Član 29.**

Raspravu vodi i usmjerava predsjednik Naučnog savjeta koji nakon okončanja rasprave oblikuje prijedlog zaključaka, stavova ili mišljenja, stavlja ih u razmatranje i na odlučivanje Naučnom savjetu.

#### **Član 30.**

O sjednicama Naučnog savjeta vodi se zapisnik koji sadrži vrijeme, mjesto, dnevni red, navode diskutirana, rezultate glasanja, usvojene zaključke, stavove ili mišljenja, kao i ostale važne događaje na sjednicama.

### **V. STRUČNI SARADNIK**

#### **Član 31.**

Administrativnostručne poslove Centra NIRSA vodi stručni saradnik.

Poslovi koji se obavljaju u Centru NIRSA definisani su ovim Pravilnikom, Pravilnikom o organizaciji i sistematizaciji sa opisom poslova radnika Fakulteta.

### Član 32.

Uslovi koje mora ispunjavati kandidat za stručnog saradnika Centra NIRSA:

- da ima master sa područja humanističkih ili društvenih nauka;
- da osim bosanskog, hrvatskog ili srpskog jezika aktivno koristi engleski jezik i pasivno još dva strana jezika u korespondenciji;
- da ima objavljen najmanje jedan rad iz oblasti iz koje je stekao zvanje magistra;
- da je sudjelovao na konferencijama i simpozijima iz humanističkih ili društvenih nauka;
- da ima iskustvo u radu naučnoistraživačkih skupina i redakcija časopisa.

### Član 33.

Stručni saradnik:

- izvršava poslove i zadatke koje mu odredi voditelj Centra NIRSA,
- vodi korespondenciju i komunikaciju sa voditeljima organizacijskih jedinica i članovima instituta, naučnih, stručnih, edukacijskih centara, Sekretarijata i Biblioteke Fakulteta,
- priprema sjednice Naučnog savjeta Centra NIRSA,
- priprema sjednice i vodi zapisnik sa sjednica pojedinačnih organizacijskih jedinica, komisija i radnih grupa,
- šalje pozive i obavještenja voditeljima instituta, naučnih, stručnih, edukacijskih centara i rukovoditeljima odsjeka i šefovima katedri na Filozofskom fakultetu u Sarajevu,
- prima, zavodi i pohranjuje dokumentaciju,
- prati i prikuplja javne pozive i konkurse institucija koje finansiraju naučnoistraživački rad i stručne aktivnosti u Bosni i Hercegovini,
- prati i prikuplja javne pozive i konkurse institucija koje finansiraju naučnoistraživački rad i stručne aktivnosti u Evropi i svijetu,
- brine se za oglašavanje prikupljenih podataka vezanih za naučnoistraživački rad i stručne aktivnosti na web stranici Centra NIRSA,
- radi na prikupljanju i popunjavanju dokumentacije vezane za prijavljivanje projekata sa posebnim naglaskom na poštivanje rokova,
- objedinjuje administrativnostručne poslove zajedno sa sekretarom Fakulteta.

### Član 34.

Stručni saradnik Centra NIRSA ima istraživačko zvanje koje je ekvivalentno zvanju saradnika na odsjecima Filozofskog fakulteta Univerziteta u Sarajevu.

## **Član 35.**

Stručni saradnik ima pravo da sudjeluje kao istraživač na projektima instituta naučnih, stručnih i edukacijskih centara na topikama projekata za koje ima odgovarajuće naučno zvanje ili odgovarajuću stručnu spremu.

## **Član 36.**

Za svoj rad stručni saradnik Centra NIRSA odgovara voditelju Centra NIRSA, odnosno prodekanu za naučnoistraživački rad, međunarodnu akademsku saradnju i izdavaštvo, sekretaru Fakulteta i dekanu Fakulteta.

## **VI. DOKUMENTACIJA**

### **1. Pohranjivanje i čuvanje dokumentacije**

## **Član 37.**

Administrativni dokumenti pohranjuju se u printanom obliku i čuvaju u prostorima Centra NIRSA, te u jednom primjerku u arhivi Fakulteta.

Administrativni dokumenti iz člana 39. - 41. ovog Pravilnika mogu se iznositi iz prostora Centra NIRSA po odobrenju voditelja Centra NIRSA.

Dokumentacija nastala u radu Centra za NIRSA čuva se i arhivira u skladu sa Pravilnikom o kancelarijskom i arhivskom poslovanju.

## **Član 38.**

Administrativni i drugi dokumenti koji se nalaze u Centru NIRSA u digitalnoj formi, jesu:

- elektronska prepiska,
- digitalizirana projektna dokumentacija,
- digitalizirani programi (razvojni i istraživački),
- digitalizirana referensna građa.

### **2. Potpisivanje i ovjeravanje dokumentacije**

## **Član 39.**

Administrativnu dokumentaciju, dopise i akte koji idu sa Filozofskog fakulteta Univerziteta u Sarajevu ispred Centra NIRSA potpisuju dekan Filozofskog fakulteta Univerziteta u Sarajevu i voditelj Centra NIRSA.

Navedeni dokumenti se ovjeravaju pečatom Filozofskog fakulteta Univerziteta u Sarajevu.

U odsustvu dekana Filozofskog fakulteta ove dokumente potpisuju prodekan za naučnoistraživački rad i međunarodnu akademsku saradnju i izdavaštvo i voditelj Centra NIRSA.

#### **Član 40.**

Sve projekte koji se prijavljuju preko Filozofskog fakulteta Univerziteta u Sarajevu potpisuje dekan Filozofskog fakulteta Univerziteta u Sarajevu.

U odsutnosti dekana Filozofskog fakulteta Univerziteta u Sarajevu, prijavu projekata na konkurse potpisuje prodekan za naučnoistraživački rad i međunarodnu akademsku saradnju i izdavaštvo.

#### **Član 41.**

Akte i dopise koji od dekanata Filozofskog fakulteta Univerziteta u Sarajevu idu prema Centru NIRSA potpisuje dekan Filozofskog fakulteta Univerziteta u Sarajevu, odnosno prodekan za naučnoistraživački rad i međunarodnu akademsku saradnju i izdavaštvo.

### **VII. SREDSTVA ZA RAD**

#### **Član 42.**

Sredstva za rad Centra planiraju se u okviru finansijskog plana Fakulteta i čine njegov sastavni dio.

#### **Član 43.**

Sredstva za rad kojima raspolaže Centar NIRSA obezbjeđuju se na sljedeće načine:

- iz sredstava budžeta Kantona Sarajevo,
- ulaganjem sredstava Filozofskog fakulteta Univerziteta u Sarajevu,
- iz komercijalnih sredstava Centra NIRSA,
- iz sredstava donacije,
- iz sponzorskih ugovora,
- iz sredstava dobivenih kroz projekte.

### **VIII. FINANSIRANJE RADA**

#### **Član 44.**

Centar NIRSA stiže sredstva za rad iz sljedećih izvora:

- sredstva koja ulaže Filozofski fakultet Univerziteta u Sarajevu, ulaganjem u opremu i infrastrukturu,
- sredstva koja Centar NIRSA pridobije prijavom na javni poziv ili konkurs za opremanje i pomoć u naučnoistraživačkom radu,
- sredstva iz ugovora o partnerstvu,

- sredstva iz sponzorskih ugovora,
- sredstva iz donatorskih ugovora,
- sredstva iz naučnoistraživačkih projekata,
- sredstva iz komercijalne djelatnosti edukacijskih centara.

## **IX. NAUČNA ZVANJA**

### **Član 45.**

U naučna zvanja prema Zakonu o naučnoistraživačkoj djelatnosti, spadaju:

- naučni saradnik (ekvivalentno: docent)
- viši naučni saradnik (ekvivalentno: vanredni profesor)
- naučni savjetnik (ekvivalentno: redovni profesor)

U istraživačka zvanja

- stručni saradnik (ekvivalentno: docent)
- viši stručni saradnik (ekvivalentno: vanredni profesor)
- stručni savjetnik (ekvivalentno: redovni profesor)

### **Član 46.**

Uslovi izbora u naučna i istraživačka zvanja, lica koja nemaju izbor u nastavno znanje na Filozofskom fakultetu, vrši se na osnovu člana 36. Zakona o naučnoistraživačkoj djelatnosti.

### **Član 47.**

U radu na projektima može biti angažiran mladi istraživač.

Mladi istraživači se angažiraju iz redova kandidata za master ili doktorat na području humanističkih i društvenih nauka.

### **Član 48.**

Mladi istraživač angažiran u projektu dobiva akademsko zvanje na osnovu odluke Vijeća Fakulteta:

- saradnik na projektu (ekvivalentno: asistent),
- saradnik na projektu sa magisterijem struke (ekvivalentno: viši asistent),
- saradnik na projektu sa magisterijem nauka (ekvivalentno: viši asistent).

### **Član 49.**

Vanjski saradnik - istraživač u projektu je po pravilu ekspert čija su znanja neophodna za realizaciju projekta.

Vanjski saradnik - istraživač se na osnovu ugovora vezanog za projekat i finansiranje projekta prima u trajanju projekta.

Prestankom ili završetkom projekta prestaje odnosno završava se angažiranje vanjskog saradnika - istraživača u projektu.

#### **Član 50.**

Svi istraživači koji sudjeluju u projektima prijavljenim preko Filozofskog fakulteta Univerziteta u Sarajevu, Centra NIRSA, moraju biti registrirani u registru istraživača Kantona Sarajevo (BIHRIS) i imati šifru istraživača.

#### **Član 51.**

U radu Centra, NIRSA učestvuju i studenti Filozofskog fakulteta Univerziteta u Sarajevu.

### **X. PROJEKTI**

#### **1. Klasifikacija projekata**

#### **Član 52.**

Centar NIRSA preko svojih istraživačkih skupina - instituta, edukacijskih centara i infrastrukturnih jedinica sudjeluje u sljedećim projektima:

- nacionalni istraživački projekti,
- međunarodni istraživački projekti,
- projekti lokalnih zajednica,
- drugi projekti.

#### **2. Pokretanje i prijavljivanje projekata**

#### **Član 53.**

Naučno vijeće Centra NIRSA donosi odluku o pokretanju i prijavi projekata.

Za sastavljanje idejnog prijedloga, odabir istraživača i metodologija, voditelj Centra NIRSA uz pomoć voditelja organizacijskih jedinica, sastavlja projektni tim koji priprema sadržaj projektnog materijala prema topikama, ciljevima i metodama.

Projekte koje inicira voditelj Centra NIRSA u dogovoru sa voditeljima naučnoistraživačkih skupina - instituta i edukacijskih centara izrađuje naučnoistraživačka skupina - institut ili edukacijski centar koji budu pozvani da se prijavi na projekat.

### **3. Finansijsko strukturiranje projekata**

#### **Član 54.**

U finansijskom planu projekata Naučni savjet Centra NIRSA obavezno planira troškove Filozofskog fakulteta Univerziteta u Sarajevu do visine utvrđene Pravilnikom o radu i Pravilnikom o sticanju vanbudžetskih sredstava Fakulteta.

#### **Član 55.**

Naučnoistraživački projekti koje iniciraju individualni istraživači, a koji se prijavljuju preko Filozofskog fakulteta i za čije izvođenje se ne koriste materijalni resursi Filozofskog fakulteta, niti stručna podrška Centra NIRSA, uračunavaju u svoj finansijski plan administrativne, stručne i troškove za potrebne usluge u iznosu 3% od vrijednosti prijavljenog projekta.

#### **Član 56.**

Sredstva ostvarena radom Centra NIRSA raspoređuju se u skladu sa Pravilnikom o radu i Pravilnikom o sticanju vanbudžetskih prihoda.

### **4. Obrada prijave i dokumentacije projekata**

#### **Član 57.**

Projekti koji se prijavljuju preko Filozofskog fakulteta Univerziteta u Sarajevu dostavljaju se voditelju Centra NIRSA, putem protokola Filozofskog fakulteta 15 dana prije isteka datuma određenog javnim pozivom ili konkursom za dostavljanje prijave.

O zaprimljenoj projektnoj prijavi i projektnoj dokumentaciji vodi evidenciju stručni saradnik Centra NIRSA.

Voditelj Centra NIRSA na temelju uvida u dostavljenu prijavu utvrđuje da li je prijava sa dokumentacijom kompletna.

U slučaju manjih formalnih nedostataka prijave ili dokumentacije, voditelj Centra NIRSA skupa sa voditeljem projektnog tima otklanja uočeni nedostatak.

U slučaju da dokumentacija nije kompletna, nepropisno ispunjena prijava, ili neadekvatno izabrane konkursne topike, voditelj Centra NIRSA pismeno obavještava prodekana za međunarodne odnose i naučnoistraživački rad i izdavaštvo i voditelja projekta.



#### **Član 58.**

Listu prijavljenih projekata za svaki javni poziv i konkurs pravi stručni saradnik Centra NIRSA i dostavlja je prodekanu za naučnoistraživački rad i međunarodnu akademsku saradnju i izdavaštvo.

#### **Član 59.**

Po obavljenom uvidu u projektnu dokumentaciju, voditelj Centra NIRSA dostavlja prikupljene prijave i projektnu dokumentaciju prodekanu za naučnoistraživački rad, međunarodnu akademsku saradnju i izdavaštvo.

Nakon pregleda prijave i projektne dokumentacije, prodekan za naučnoistraživački rad, međunarodnu akademsku saradnju i izdavaštvo dostavlja projektnu dokumentaciju na potpis i ovjeru dekanu, ili u odsustvu dekana ~~sam~~ potpisuje i ~~ovjerava~~ istu.

#### **Član 60.**

O rezultatima konkursa voditelj Centra NIRSA obavještava dekana Filozofskog fakulteta Univerziteta u Sarajevu, odnosno prodekana za naučnoistraživački rad i međunarodnu akademsku saradnju i izdavaštvo.

### **XI. POSLOVNA TAJNA**

#### **Član 61.**

U poslovnu tajnu Centra NIRSA spadaju podaci i dokumenti:

- koje kao povjerljive Centru NIRSA dostavi nadležni organ i drugi pravni ili fizički subjekt,
- koji sadrže ponude za poziv ili javni konkurs koji objavljuje Filozofski fakultet do trenutka objavljivanja rezultata,
- koje kao poslovnu tajnu odredi naučni savjet ili voditelj Centra NIRSA.

#### **Član 62.**

Saznanja o dokumentima, podacima, tehničkom kapacitetu i opremi, planovima razvoja i aktivnostima koje su određene kao poslovna tajna moraju čuvati svi uposlenici Centra NIRSA, voditelji i članovi naučnoistraživačkih skupina - instituta, edukacijskih centara, te Sekretarijat i Biblioteka Fakulteta i infrastrukturnih jedinica, bez obzira na način na koji su do tih saznanja došli, i nakon prestanka angažiranja u centru NIRSA ili na Filozofskom fakultetu Univerziteta u Sarajevu.

## **XII. OPŠTI AKTI**

### **Član 63.**

Osim ovog Pravilnika Centar NIRSA ima i druge opšte akte kojima se uređuju pitanja od važnosti za rad i poslovanje Filozofskog fakulteta Univerziteta u Sarajevu.

Akti iz stava 1. ovog člana donose se u skladu sa Pravilima Filozofskog fakulteta Univerziteta u Sarajevu (Prečišćeni tekst).

Pojedinačne odluke voditelja i Naučnog savjeta Centra NIRSA moraju biti u skladu sa Zakonom, Statutom i Pravilima Filozofskog fakulteta Univerziteta u Sarajevu.

## **XIII. PRELAZNE I ZAVRŠNE ODREDBE**

### **Član 64.**

Ovaj Pravilnik donosi i usvaja Vijeće Fakulteta.

### **Član 65.**

Sve naučnoistraživačke aktivnosti, rad na projektima, centri, stručne aktivnosti, redakcije i drugi oblici organizovanog naučnog rada, istraživanja i stručnih aktivnosti na Filozofskom fakultetu u Sarajevu, koji su formirani prije dana donošenja ovog Pravilnika, nastavljaju rad u okviru Centra NIRSA.

### **Član 66.**

Svi voditelji projekata instituta, centara, redakcija časopisa i drugih oblika organizovanog naučnog rada, istraživanja i stručnih aktivnosti na Filozofskom fakultetu Univerziteta u Sarajevu, koji su postavljeni ili izabrani prije donošenja ovog Pravilnika, nastavljaju raditi i djelovati na način kako su započeli navedene aktivnosti.

### **Član 67.**

Izmjene i dopune Pravilnika donose se na način na koji je i donesen Pravilnik Centra za naučnoistraživački rad i stručne aktivnosti.

### **Član 68.**

Tumačenje odredbi ovog Pravilnika daje Vijeće Fakulteta.

**Član 69.**

Ovaj Pravilnik stupa na snagu osmog dana od dana objavljivanja.

